

COMUNICATO n. 2144 del 05/08/2025

**TreC Mamma, da naüge App augelekk von provintziäl sanitér Dianst boda mage khemmen genützt
âna zo mocha zaln est iz khent no gepezzart pitt naüge funktziongen**

Naüge vor TreC Mamma: bia zo mövrarse un an kanàl News vor di trentinar naüge müatar

**[Cimbro] In lai 24 månat, TreC Mamma hatt gebèkslt di muatarschaft vor mearar baz
4800 baibar, gebante schütz vor allz bazta iz mångl vor aniaglaz baibe in di noün
månat boz nåtrak.**

**Von earst von månat von snitt di App TreC Mamma, didjital hauppunkt vor di baibar
boda nåtrang un vor di naüng mämme vodar autonome Provèntz vo Tria, iz khent
vornaügart pinn zil zo macha khennen pezzar allz bazta iz mångl un zo geba hilfe
garade aniaglan durch an interaktif struméntn un pitt darkhennate bizzschaftege
innhalt.**

Di bichtegarsten naüge innhalt soinz:

- An kurs zo lirna machan da djüst djimnastika durch an chatbot: 'z izta khent inngevüart an video boma mage seng bia zo macha dise esertschitzie, nå un nå vo drai månat in drai månat vor da gântz zait boma nåtrakk. Dise matardjeldar soin khent gemacht pittnândar pitt hövaren, djinekòloge un fisiatre un iz khent draugeschauget von dökhtür von provintziäl sanitér Dianst. Ma halteta però zo khöda ke di sèlln baibar boda nèt stian gântz garècht un magatn vorliarn 'z khinn, mochan an earstn höarn soin dokhtur vorsa âhevan disa aktivité.
- An khurtzan kurs atz baz 'z iz pezzar èzzan: disa App bart zoang bazzez iz pezzar èzzan vor di baibar boda nåtrang, disar kurs o khint gemacht durch an chatbot. Disar didaktik toal lekk vür an video vo bintsche minùtn un dena khurtze quiz z'sega bima hatt vorstånt. Da o di matardjeldar soin khent gemacht pittnândar pitt hövaren, djinekòloge un nutritzionistn draugeschauget von Dietètik un Klinische Spaizarung Dianst von provintziäl sanitér Dianst.
- Kanal News: 'z izta khent augelekk a naügar kanàl zo geba informatziongen, boma mage gian z'sega garade vodar earstn sait vodar App. Disar strumént bart zuargem zo macha bizzan bahémme in nützar alle di naüng sachandarn boma vennt atz TreC Mamma un mage khemmen genützt von sanitér profesionistn o zo macha bizzan ben un bia 'z bartnse haltn di kürs zo boroatase aftz geborta, darvern di trèff augelekk un ândre sachandarn boda âgian in baibar un soin famildje.

Di baibar boda sa nützan disa App tarfan lai ainfach vornaügarnse, anvétze berdase nonet hatt inngestèllt bart vennen sa di naüng funktziongen balz bart inngian vor da earst bòtta.

Da lest naüge geat â in formular anonimo zo khöda bazma pensàrt boda di mämme mang vennen afte home page vo di TreC Mamma. Auzzovùlla in formular lekmada zirka 10 minùtn un iz gântz grüntlich zo vorstiana bazta hãm mångl di nützar vodar App un asó pittar zait makmase auzpezzarn un vornaügarn hèrta mearar nå in sèll bodaz khint khött. Dar formulàr bart mang khemmen auzgevüllt sin atz 30 von herbestmånat 2025.

Dise vornaügarung sojn no a tritt vürsnen von didjitaln dienst boda khemmen geopfart vor di gesunthait von müatar un von khindar in Trentino, dar trentinar sanitér Dienst lekkse asó no memarar untar zo venna hèrta pezzarne strumentn boda mang khemmen genützt vo alln.

Di App TreC Mamma

Augelekk von 8 von snitt von djar 2023, di App TreC Mamma izzese auzgenump vor daz sèll sojn guat zo vorstiana bazta hām māngl di baibar boda nātrang haltante kunt vo mearare disziplinen. Di date von sèlln boda nützen di App khön ke di laüt sojn kontént: alle tage mearar baz 550 baibar nützen di App z’sega bazta khint getānt un maga hām alle di sèlln informatziongen boda sojn nützlich zo zügla a khinn un bazta bèkslt in kreschran.

Date bia di App khint genützt:

- Sin haüt 4.804 baibar von Trentino hām abegevazzt di App in media hāmsa 32 djar.
- Dar 12,5% sojn baibar nèt belesch. Dar 56% von baibar trakk nā vor da earst bòtta, dar 31% anvétze vor da zboate un di āndarn (12,5%) trang nā vor da draite odar mearare bòtta.
- Di App khint abegevazzt daz mearaste atz belesch (99.5%), ma makz tüan saiz atz inglés, saiz atz frantzés.
- In media di baibar boda abevazzan di App trang nā sidar 13 bochan.
- Di informatziongen boda gitt di App sojn khent gesek 14.000 vert in di lestn sèks mānat un 28.783 in lest djar un mearar baz 43.000 sidar azze iz khent augelekk vor zboa djar.

Di sachandarn mearar gesüacht un gesek sojn di sèlln boda āgian di kontròlle boma mocht machan balma paitet, bele sintome mochan hām an ailegen kontròll un bele anvétze sojn vo alle tage balma paitet un no di informatziongen boda āgian di earstn drai mānat boma nātrakk.

Di App, darzuar in naüng schandarn boda sojn khent inngeväart un boda sojn khent khött da, opfart no ettlane āndre funktziongen, zbisnen disan:

- Seng di apuntamento von CUP: di sèlbart informatziongen von baibar boda khemmen inngett balma inngeat in di App sojn gepuntet pinn informatif sistèm vodar Apss un gem zuar zo maga seng alle di apuntamento boma hatt genump durch in CUP von provintziāl sanitér Dienst.
- Drauschaung un nāstian: a kalandardjo boda boch vor boch steat nā in khinn un in allz daz sèll boda bèkslt in di muatar, khödante baz un bia zo tüana vor aniaglana fase.
- Zertifikarate inhalt: ma mage hām informatziongen studjart von ekspèrte von provintziāl sanitér Dienst boda gian vodar gesunthait von laip afta sèll psikologesch un rispundarn in vorsch boda aniaglaz baibe machten balz nātrakk un khütten in pratika baz zo tüana.
- A tagepuach vor disa zait: pitt disan, di muatar mage innschraim alumma informatziongen un briavan bose haltet guat zo mocha gedenkhan.
- Edukatif hilfe boda khint gètt durch an virtual asistént (chatbot GEA): artikln, video un skède aftz bichtege tème azpe di gesunthait balma nātrakk un bia zo boroatase vor balda bortet ’z khinn.
- Link aftz websaitn boda mang gem hilfe: a virtuāl platz boda di müatar mang vennen nützliche indiritze zo venna un zo geba fhilfe ummaz pinn āndar.

Di App khint vorgelekk von hövaren sa von earstn trèff bosa haltn pinn baibar boda nātrang zo boroatase balda bortet ’z khinn. Ma hatta überhaup gehalten zo nemma inn alle: di App TreC Mamma iz in drai zungen (belesch, inglés un frantzés) zoa azta di mütar inngeschribet in provintziāl sanitér Dienst ma boda nèt vorstian daz belese mang nützen allz ummaz disa App, un aftz disan bege bartma gian no vür z’arbata un zo

venna näüge solutziongen zo vüara di baibar un soine famildje in schümme viazo zo khemma mämme, pinn zil zo geba aniaglan baibe daz sèll boz hatt mængl.

Di App TreC Mamma khint z'soina drinn in prodjèkt "Didjitäl sanitér un artifitziäl intelligentz – strumentn zo nempra in sanitér Dianst in pürger pezzrante asó in provintziäl sistèm", ågenump pittar [delibera vodar provintziäl Djunta von 22 kristmånat von dajr 2022](#) boda innhaltet an toal boda ågeat pròpio in "earstn tausankh tang lem". 'Z zil iz auleng an didjitäl sanitér sistèm guat zo schütza un auzohalta di baibar un di khindar zo machanen zornèrn mode zo leba boda macht stian garècht saiz azpe laip, saiz azpe hirn.

Übarsetzt von Schaltarle vor di zung von Toalkamou vodar Zimbar Hoachebene

(cdt)